

Eine Predigt D.
 Martin Luthers. Von Nüchtere-
 keit vnnnd Messigkeit / Widders
 völlerem vnd Trunckens-
 heit. Aus der Epistel
 S. Petri.

1. Petri 4.

Lieben Brüder: Seid messig vnd
nüchtern zum Gebet.

1. Corinth. 6.

Lasset euch nicht verführen: Weder
 die Hurer / noch die Abgöttischen / noch die Ehebre-
 cher / noch die Diebe / noch die Geizigen / noch die
 Trunckenbold / noch die Lesterer / noch die Neuber //
 werden das Reich Gottes ererben.

M. D. LII.

Abb. 4^a (23)



[Faint, mirrored text bleed-through from the reverse side of the page, likely a title page or a page with a large heading. The text is illegible due to fading and bleed-through.]

[A rectangular piece of paper or tape is pasted onto the bottom edge of the page, partially covering the bleed-through text.]



Am Sontag nach der
Himelfart Christi / Epistel
i. Petri am vierden Capittel.

Lieben Brüder / Seid messig
vnd nüchtern zum Gebet ꝛc.



Dies stück ist auch
eine vermanung zu Christo-
lichem leben / vnd fruchten
des guten Baums / der da
heisst / ein Christen / das ist /
der da nu hat durch seinen
glauben erlösung von sün-
den vnd todt / vnd gesezt ist
in das reich der gnaden vnd
ewiges leben / das er hinför-
der also lebe / damit man spüren möge / das er solchen
schatz gefasset habe / vnd sey nu ein newer Mensch wor-
den.

Er erzelt aber auch etliche gute werck / vnd sonder-
lich im ersten stück / treibt er die vermanung / so er in die-
sem Capitel angefangen / Das sich die Christen sollen
enthalten / der groben stücke / der fleischlichen lüste / so inn
der Welt zu zotten gehen / des wüsten / vnordentlichen /
Heidnischen Sewlebens / inn fressen / sauffen / truncken-
heit ꝛc. Vnd vermanet / das sie sich vleissen / nüchtern zu

A ij seit

sein zum Gebet. Denn er hat diese Epistel geschrieben/
des mehrer teils/ an die in Griechenland / vnter welchen
waren der gemeine hauffe auch gute gesellen / die nur ge-
wenet waren / zu schlemmen vnd voll zu sein/ wie man
vns Deudschen auch schuld gibt / vnd zwar nicht on vr-
sach.

Damit er nu die Christen / von solchem laster / zu
nüchtheit vnd messigkeit bringe / erinnert er sie (wie
auch an viel mehr orten die Apostel thun) ires Ampts
vnd wercks / welches sonderlich der Christen eigen / vnd
der einige rechte Gottesdienst ist / darumb sie Christen/
vnd von alle anderer welt/vnterscheiden sind/ Wil also
sagen/ Die Christen sollen nicht solch Heidnisch ruchlos
luderleben führen/in fressen/sauffen/ schlemmen vnd tem-
men / Denn sie haben etwas anders zuthun/das da gros
ist.

Nemlich/ zum Ersten/ Das sie ander leut werden/
vnd mit Gottes wort vmbgehen / dadurch sie ire newe
geburt haben vnd erhalten.

Zum Andern / Nach dem sie nu new geboren sind/
haben sie einen Feind / das ist der Teuffel / vnd jr eigen
fleisch (durch den Teufel verderbt / vnd voll böser lüste
gesteckt) da sie müssen mit kempffen/ so lang sie auff Er-
den leben. Weil sie denn in solch Ampt vnd streit gesetzt
sind/so müssen sie nicht faul noch schlefferig/viel weniger
volle vnd tolle Sew sein/welche gar keines dings achten/
noch dencken/was sie zu thun haben/ Sonder wacker vñ
nüchtern / vñnd allezeit geschickt sein/mit Gottes wort
vnd irem gebet.

Denn das sind die zweyerley wehre vñnd woffen/
damit der Teuffel geschlagen wird/ vñnd dafür er sich
auch

auch fürchtet / vleissig Gottes wort hören / lernen vnd
üben / sich damit zu vnterrichten / trösten vnd stercken /
Vnd zum andern / wenn die anfechtung vnd streit ange-
hen / das herz empor heben (auff dasselbige wort) vnd zu
Gott schreyen vnd ruffen vmb hülffe / Also / das der bei-
der eines imerdar gehe / als ein ewig gesprech / zwischen
Gott vnd dem Menschen / Entweder / das er mit vns re-
de / da wir still sitzen vnd im zuhören / Oder / das er vns
höre mit im reden / vnd bitten / was wir bedürffen.

Es geschehe nu welches wolle / so ist es dem Teuffel
vnleidlich / vnd vermag da wider nicht zu bleiben / Dar-
umb sollen die Christen mit beiden gerüstet sein / das jr
herz für vnd für gegen Gott gerichtet / sein wort behalte /
vnd mit stetem seuffzen ein ewiges Vater vnser bete /
Wie denn solches einen Christen wol leren solten die an-
fechtung vnd not / damit er stets vom Teuffel / Welt vnd
Fleisch bedrenget wird / das er imerdar mus an der spitz-
en stehen / wachen vnd auffsehen / wo der Feind an in wil /
welcher auch keinen augenblick schleffet / noch feiret ꝛc.

Dazu gehöret nu / das S. Petrus hie sagt / das ein
Christen sey ein solcher Mensch / der auch mit essen vnd
trincken seinen leib messig vnd nüchtern halte / vnd nicht
mit vbermessigem fressen vnd völlerey belade / vnd ver-
derbe / auff das er wacker / vernünfftig vnd geschickt zu
beten sey / Denn wer sich nicht des vleisset / das er nüch-
tern vnd messig seines Ampts oder standes warte / son-
dern ein volle Saw / vnd ein teglicher Trinckenboldt ist /
der kan auch nicht geschickt sein / weder zu beten / noch an-
dern Christlichen sachen / Ja er dienet auch sonst zu kei-
nem dinge.

Hie were wol not einer sondern Predigt vnd ver-
manung /

A iij

manung /

manung/für vns wüsten Deudſchen/wider vnſer völler
rey vnd trunckenheit / Aber wo wolten wir die Predigt
nemen/die da ſtarck vnd krefftig gnug were/dem ſchend-
lichen Sewleben vnd Sauffteuffel bey vns zu wehren
Denn es iſt (leider) nu gar mit wolckenbruſt vnd Sinds-
flut eingeriſſen / vnd alles vberſchwemmet / vndt gehet
noch teglich/je lenger je mehr/durch vnd durch inn allen
Stenden/höheſten vnd niderſten / das alle Predigt vnd
vermanen viel zu ſchwach iſt / vnd ſchier dauon gar ſtill
zu ſchweigen/ als das doch vmb ſonſt / vnd nicht gehort/
ſondern verachtet vnd verlacht würde / Wie denn die
Apoſteln/vnd Chriſtus ſelbs verkündigt hat / Das am
ende der Welt ſolchs regieren würde / Vndt derhalben
ſeine Chriſten vermanet/das ſie ſich hüten/das ire herzen
nicht beſchweret werden/mit freſſen vnd ſauffen / vnd
ſorge dieſes lebens/ 2c. auff das nicht jener tag ſchnell
vnd plözlich (wie ein fallſtrick) vber ſie kome.

Nu ſolten ja billich wir Deudſchen/ weil vns
Gott zu dieſer lezten zeit/ aus groſſer gnaden/ das liecht
des Euangelij ſo reichlich gegeben hat / auch demſelben
zu ehren vnd danck/vns in dieſem ſtück beſſern / auff das
wir nicht vber andere ſünde/auch durch diſ laſter / Got-
tes zorn vnd ſtraffe vber vns heuffeten/ Denn bey ſolch-
em wüſten leben / kan auch nichts anders folgen / denn
ſicherheit vnd verachtung Gottes / das die Leut wie die
Gew/in ſteter vollerey/gleich als ertödtet vnd begraben/
keine Gottes fürcht haben / noch mit Göttlichen ſachen
ſich bekömmern können.

Vndt/ wenn ja nicht anders helffen wölte / ſo ſolt
vns doch die ſchande bewegen/ ſo vber vns in ander Lan-
den gehet/ Denn inn dem ſtück haben andere Nationen/
(ſonderlich

(sonderlich Belschland) ein grosse hoffart vnd trok wi-
der vns/das sie vns heissen/die vollen Deudschen/Denn
die tugent ist dennoch bey jnen/das sie nicht solche trun-
cken volle Leut sind / Die Türcken aber sind hierin rech-
te Mönche vnd Heiligen/ vnd so fern von diesem laster/
das jnen auch durch jren Mahmeth / wein vnd aller
trancck/dauon ein Mensch truncken wird/ verboten/ vnd
für der grösten laster eines bey jnen gestraffet wird/ dar-
umb sind sie auch besser Kriegsleute / denn vnser voller
hauffe / als die allezeit nüchtern vnd wacker / jr ding inn
grosser acht haben / rathschlagen vnd trachten / wie sie
vns angreifen / vnd jmer mehr Land vnd Leut gewin-
nen/weil wir in vnser vollerey liegen / als solten wir nur
mit sauffen vnd schwelgen jnen obsiegen.

Aber was hilfft es hievon viel sagen? Weil es also
eingerissen / das es nu ganz ein gemeiner Landbrauch ist
worden / vnd nicht mehr allein vnter dem groben gemei-
nen vngezogen Pöbel / auff den Dörffern vnter den
Bawren/vnd in offenen Tabernen/Sondern nu inn als
len Stedten/vnd schier in allen Heusern/vnd sonderlich
auch vnter dem Adel/ vnd zu Fürsten höfen / vber vnd
vber gehet.

Ich gedencke/da ich jung war/das es bey dem Adel
ein treffliche grosse schand war / vnd das löbliche Herrn
vnd Fürsten mit ernstlichem verbot vnd straffen wehres-
ten/ Aber nu ist es vnter jnen viel erger/ vnd mehr/ denn
vnter den Bawren/ Wie es denn pflegt zu gehen/ wenn
die grossen vnd besten beginnen zu fallen/das sie hernach
die ergesten werden / Bis es dahin komen ist/ das auch
Fürsten vnd Herrn selbs von jren Junghern solchs ge-
lernet/vnd sich nu nicht mehr des schemen/ vnd schier wil
eine

eine ehre/ vnd Fürstliche/ Adelige/ Bürgerliche tugent
heissen/ vnd wer nicht mit jnen eine volle Saw sein wil/
der wird verachtet/ da die andern Bier vnd Wein ritter
grosse gnad/ ehre vnd gut mit sauffen erlangen/ vnd wol-
lens berümbt sein/ als hetten sie daher jren Adel/ Schilt
vnd Helm/ das sie schendlicher Trunckenbold sind/ denn
andere.

Ja / Was solt mehr hie zu wehren sein? Weil es
auch vnter die Jugent ohn schew vnd scham eingerissen/
die von den Alten solchs lernet / vnd sich darinnen so
schendlich vnd mutwillig/ vngeweget/ in jrer ersten blüt
verderbt / wie das Korn vom Hagel vnd Plakregen ge-
schlagen / das jekt das mehrer teil vnter den feinsten/ ge-
schicktesten jungen Leuten (sonderlich vnter dem Adel
vnd zu Hofe) vor der zeit / vnd ehe sie recht zu jren jaren
komen/ sich selbs vmb gesuntheit/ leib vnd leben bringen.

Vnd wie kan es anders zugehen/ wo die/ so andern
wehren/ vnd straffen sollen/ selbs solchs thun? Darumb
ist je Deudschland ein arm/ gestrafft vnd geplagt Land/
mit diesem Sauffteuffel/ vnd gar erseufft in diesem La-
ster/ das es sein leib vnd leben / vnd dazu gut vnd ehre
schendlich verzeret/ vnd durch aus citel Sew leben füret/
das/ wenn man es malen solt/ so müst man es einer Saw
gleich malen.

Summa/ es ist in Deudschen landen nicht mehr/
denn noch ein klein stück vberig / von diesem laster vnbe-
fleckt/ Das sind/ junge Kinder/ Jungfrawen vnd Fraw-
en / die haben doch noch ein wenig schew dafür / Biewol
man auch vnter dem Schleyer erwo vnflätige Sew fins-
det / Aber doch halten sie noch / Denn es ist dennoch so
viel zucht noch blicben/ das jederman mus sagen. / Es
stehe

stehe zumal schendlich / wenn sich ein Weib voll schuffet /
Das es werd were / das man solche mit füssen trete auff
der gassen. An solchem Exempel solten wir doch
lernen / vnser schand ansehen / vnnnd ein wenig dafür
rot werden / Denn so wir sehen / wie vbet es inen anste-
het / wie viel mehr solte sich das Mansvolck dafür sche-
men? welches je solt vernünfftiger vñ tugentreicher sein /
Wie auch S. Petrus das Weibs bild ein schwacher ge-
fess nennet / weder den Man / das derhalben mehr gedult
mit inen zu haben / Denn einem Man ist ja mehr vnnnd
höher verstand / mut vnd bestendigkeit gegeben / darumb
sol er auch vernünfftiger / vnnnd weniger ein Saw sein /
Das es im inn der warheit / auch nach der vernunfft zu
rechnen / viel grösser schand ist / in diesem laster vbertret-
ten / Denn je höher vnd Adelicher er von Gott geschaf-
fen vnd begabt ist / je schendlicher im solch vnuernünfftig
Gewisch leben anstehet.

Aber was sol man sagen? Es h. gar mit vns
verkeret / das kein Exempel der menlichen tugent vnd
ehre (in diesem stück) weniger / denn bey Mans personen
ist / Vnnnd nur das einige stücklin eines guten Exempels
vberig ist bey dem Weiblichen geschlecht / welche vns vn-
ser schand zeigen vnd auffrücken (wo etwo eine ein trun-
ckenbold ist) Zu dem / das wir on das aller anderer Land
spot vnd schande sind / die vns halten für schendliche vn-
fletige Sew / die nur tag vnd nacht trachten / wie sie voll
vnd toll sein / vnd keine vernunfft noch weisheit bey vns
sein kan.

Es were noch zu dulden vnd zu vbersehen / wenn
doch ein wenig eine masse were des schwelgens vnd sauf-
fens / oder je zu zeiten aus versehen einer einen trunck zu
viel thete / oder nach grosser arbeit vnd mühe vnlustig / et-
wo reuschig

wo reuschig würde / Wie man auch einem Weibe ver-
gönnen mus/so sie auch auff einer Hochzeit ein trüncklin
mehr thete/ denn daheim / Aber also alle tag vnd nacht
on auff hören mit hauffen in sich giessen/ vnd wider von
sich geben / Das man flugs auff's new sich fülle / das ist
nicht Fürsten/Adels/oder Bürgers / ja nicht eines mens-
schen (zu schweigen eines Christen) Sondern einer rech-
ten natürlichen Saw/ leben vnd werck.

Ist dir doch wol vergönnct / von Gott vnd jeder-
man/das du nicht allein zur notturfft / sondern auch zur
lust vnd freude essest vnd trinckest/ vnd guter dinge sei-
est/vnd du kanst an solchem nicht begnüget sein / du seiest
denn auch eine solche Saw vnd vnlust/ als werestu dazu
geborn/ Bier vnd Wein zu verderben/ Wie man jetzt inn
Fürsten höfen solche vbermas/mit pancketieren vnd fül-
leren siset/ als wolt mans gerne alles auff eine stund ver-
schwelgen vnd vmbbringen / Daher denn auch kompt/
das beide Herrn vnd Fürsten/ vnd Adel verarmen/ vnd
das Land zu eitel Betler werden vnd verderben mus/
weil man so vn menschlich Gottes gaben dahin verschüt-
tet vnd verschwendet.

Wolan (wie ich gesagt habe) Es hat leider dis la-
ster so weit vberhand genommen/ das es in der Welt nicht
mehr zu wehren ist/ Ohn / ob etwo Gottes wort helffen
wolte/bey wenigen vnd einzelen/ die doch noch Mensch-
en/vn auch gerne Christen sein wolten/ Der ander hauf-
fe bleibt doch wie er ist/sonderlich/weil hie zu das Welt-
lich Regiment nichts thut. Vnd ich halte / wo nicht
Gott mit einer Landtstraffe diesem laster wehren wird/
(denn sonst ist jm vngesteuret vnd vngewehret) so wer-
den auch noch beide/ junge Kinder / vnd Weibs bilde zu
Serwen

Sewen werden / vnd der Jüngste tag (wenn er kempt)
Keine Christen nicht finden wird / sondern alles nass vnd
voll / in abgrund der Hellen faren.

Aber hie sollen die / so da wollen Christen sein / wiss
sen / das auch diese tugent / nüchtern vnd messig sein / sol
vnter den Christen gesehen werden / vnd die vollen Sew
nicht vnter die Christen gehören / noch selig werden mü
gen (wo sie nicht sich bessern vnd auff hören) Wie auch
S. Paulus deutlich von solchen sagt / Gal. 5. Offenbar
sind die werck des fleisches / als da sind / Ehebruch / Hur
rey / unreinigkeit / vnzucht / Abgötterey / Zauberey /
Feindschafft / Hader / Mord / Sauffen / Fressen / vnd der
gleichen / von welchen ich euch zuvor gesagt habe / vnd sa
ge noch zuvor / das / die solches thun / werden das Reich
Gottes nicht ererben.

Da hörestu / das so wenig als ein Hurer / Ehebre
cher zc. erbe hat an dem Reich Gottes / so wenig gehöret
auch ein Trunckenbold / so tag vnd nacht in füllerey ligt /
zu Gottes Reich / Auff das du wissest / das gleich / wie Ab
götterey / Ehebruch zc. sünde ist / die den himel zuschleust /
Also auch diese Füllerey solche sünde sey / die dich hindert
an deiner Tauffe / vergebung der Sünden / glauben an
Christum / vnd an deiner eigen seligkeit.

Darumb / so du wilt ein Christen sein / vnd selig
werden / so mustu dencken / das du nüchtern vnd messig
lebest / Wo du aber solches nicht achtest / noch denckest se
lig zu werden / so fare jmer hin / vnd sey ein vnchrist vnd
vnmensch / so lang es Gott von dir leiden wil.

Werest du ein Christen / vnd woltest dich nicht lassen
B ij bewegen /

bewegen/ beide/ leibliche schaden vnd schande/ darein du dich selbst fürest/ vnd dich nicht allein vmb gelt vnd gut bringest/ sondern auch dein gesuntheit vnd leben verkürzest/ vnd dazu für allen Engeln vnd Menschen ein vnflätige Saw gescholten vnd gehalten würdest/ So solte dich doch bewegen/ das dir Gott lest sagen/ vnd gebeue/ bey ewiger verdammis/ das du von solchem vnchristlichen wesen ablassest/ oder solt sein gnad vnd ewige seligkeit verloren haben.

Lieber Gott / wie sind wir doch so schendliche vndanckbare Leute / die wir doch so reichlich von Gott begnadet sind/ mit seinem wort/ vñ erlöset von des Papsts Tyranney/ der auch vnser schweis vnd blut hat von vns haben wollen/ vnd dazu vnser gewissen mit seinem gesetz gemartert vnd geengstet / Das wir doch widerumb/ dem Euangelio zu ehren/ vnd Gott zu lobe vnd danck/ vnser leben auch etwas besserten. Es solten doch/ wo etwo noch frome Eltern weren (oder Gottfürchtige Christliche Regenten) dieses laster etwas weniger zu machen/ iren Kindern vnd Gesind/ mit ernster straffe weren/ Vñ die Pfarherr vnd Prediger sind schuldig / die Leut offte vnd mit vleis zu vermanen / nit fürhalten Gottes vngnade vnd zorns/ vnd schadens/ so diesem Laster folgen/ an Seel/ Leib vnd Gut/ Ob es doch wolt helffen/ vnd etliche bewegen/ vnd solche/ so inn solchem Laster freuenlich vnd öffentlich verharren / vnd sich nicht bessern wollen/ (vnd doch auch sich mit des Euangelij rhümen) nicht zum Sacrament / noch bey der Tauffe stehen zu lassen/ Sondern für öffentliche vnchristen halten/ vnd sich irer eussern/ so wol als öffentlicher Ehebrecher / Bächerer/ oder Abgöttische / Wie auch S. Paulus solchs befilhet 1. Corinth. 5. So jemand ist/ der sich leset einen Bruder nennen/

nennen / vnd ist ein Hurer / oder Geiziger / oder ein Abgöttischer / oder ein Lasterer / oder ein Trunckenbold / oder ein Reuber / mit dem selben solt jr auch nicht essen / zc.

Aber hievon ist jst nicht lenger zu sagen / wir wollen widerumb S. Petrum hören / der vns vermanet / nüchtern zu sein / auff das wir des Gebets warten können / als die da nu Christen sind / vnd von der Welt Heidnischem wüsten leben abgetretten / wie er furz vor diesem Text gesagt hat / Es ist gnug / das wir die vergangen zeit des lebens zubracht haben / nach Heidnischem willen / da wir wandelten in mutwillen / lüsten / trunckenheit / fresserey / seufferey zc. Vnd nu dazu beruffen vnd gesezt / das wir durch vnsern glauben vnd gebet streiten sollen wider den Teuffel.

Wie er hernach Cap. 5. solche vermanung abermal widerholet / vnd klerer ausdrückt / das sie sollen nüchtern sein vnd wachen / Vnd ob du woltest fragen / Warumb ist das so hoch von nöten? En darumb (spricht er) denn ewer Widersacher / der Teuffel / gehet vmb her vmb euch / wie ein brüllender Lewe (vmb eine herd Schafe) vnd suchet / welchen er möge verschlingen.

Weil jhr denn ein solch Volck seid (wil er sagen) welches beruffen ist zu dem kampff / wider solchen gewaltigen Geist / der vnser Seele meinert / vnd viel giriger darnach ist / denn kein Wolff des Schafes / so müst jr dencken / wie jr jm widerstehet / vnd für jm bleiben möget / welches geschicht allein durch den glauben / vnd durch das gebet. Auff das jr aber können beten / so müset jr auch nüchtern vnd wacker sein / Denn bey den Schwelgern vnd trunckenen Sewen / ist die vernunfft begraben / das
E sie keines

sie keines dinges können achten / vñnd zu keinem guten werck geschickt sind / darumb ist inen auch das gebet vñd anruffen genomen / vñd hat sie der Teuffel gewonnen / vñ gefressen / wenn er wil.

Man sihet noch / wie die Christen in der ersten Kirchen (da sie grosse verfolgung gelidten) in diesem stück so vleissig gewesen / vñd schier mehr denn zu willig / das sie teglich / nicht allein morgens vñd abends / sondern auch etliche bestimpte stunde zusammen komen / vñd mit einander gebetet haben / auch oft ganze nacht gewachtet / vñd mit beten zubracht / Etliche haben solchs so seer getrieben / das sie zu weilen bis in den vierden tag nicht gessen haben / wie S. Augustinus sagt.

Das ist wol etwas zu eng gespannet / sonderlich da man hernach ein Exempel vñd gebot daraus gemacht / Aber das ist dennoch zu loben / das sie abends vñd morgens / vñd allezeit / fein nüchtern gewesen / Darnach da solchs auffgehört in der gemeine / ist gefolget das leidige volck der Mönche (die da fürgegeben haben / für die andern zu beten) welche wol dieselben stunden vñnd zeit / Metten / Vesper / vñd andere behalten / aber nicht gebetet / sondern allein gedönet / oder gemurret vñd gelöret haben.

Wir haben noch dauon vberig die Kinder schulen / dadurch noch das abend vñ morgen gebet erhalten wird / Aber es solt in eines jeden Christen Haus auch also gehen / Denn ein jeder Hausvater ist schuldig / seine Kinder dazu zuhalten / auff's wenigst / des morgens vñ abends zu beten / vñd Gott zu befehlen alle not der Welt / das er wölle seinen zorn abwenden / vñd nicht straffen / wie wir verdienen.

Also

Also sind wir recht geleeret/vnd doch nicht hoch beschweret/vnd were vns vnuerboten/essen/trincken/vnd kleiden zur notturfft/vnd auch zu ehren vnd freuden/ allein das wir nicht Vnfläter vnd Sew werden/ vnd so schendlich die vernunfft begraben/ welches doch einem Menschen sünd vnd schand ist/ wenn gleich kein Gote noch verbot were/ vnd ja viel weniger von Christen zu leiden/ weil auch bey den Heiden vnd Türcken in diesem stück mehr tugent ist/ vnd wir vns müssen für jnen scheemen/welchen wir billich solten solch Exempel geben/ das sie sich für vns scheemen müsten/ vnd vns zum höchsten dafür hüten/ das sich niemand an vnserm leben ergern möchte/damit nicht Gottes Namen verlestert/ sondern gepreiset würde/ wie auch S. Petrus am ende dieser Epistel vermanet.

Wie nu von nüchternkeit gesagt ist/ also ist auch zu sagen von der andern tugent/die da heisset/ Messigkeit/ (welche S. Petrus alhie am ersten sehet) denn sie gehören beide zusammen/ On das messig sein/nicht allein gehet auff essen vnd trincken/ sondern wider alle vnordentlich/ vbermessig wesen inn eusserlichem leben/ mit Kleidern/ schmuck/vnd was mehr vberflus vnd vbermas ist/ da einer für vnd vber den andern zu gros vnd köstlich erfür brechen wil.

Wie ist in der Welt auch vberaus vberhand genommen/das nirgent keine masse mehr ist/ des vbermachten kostens/mit Kleidung/ Hochzeiten/ Wirtschafften/pancketieren/bawen zc. darob beide/ Herrschafft/vnd Land vnd Leute verarmen müssen/weil niemand mehr inn seiner mass bleibt/ sondern schier ein jeder Bawr einem Edelman gleich/darnach der Adel auch den Fürsten zu

E ij uor

vor thun wil/ Das auch dieser tugent (leben so wol als der
nüchtheit) schier kein Exempel mehr bey vns zu sehen
ist/so gar ist hie das Regiment / ernst vnd zucht bey vns
gefallen.

Du wird hie auch nicht verboten / was inn solchen
sachen / nach eines jeden Stand zimlich vnd ehrlich ist/
auch zur lust vnd freude / Denn S. Petrus wil auch
nicht der vnflätigen/ rostigen vnd schmutzigen Mönche/
oder der sawrsehenden Heiligen / mit irer heuchelei vnd
schein eines trefflichen strengen lebens / damit sie auch
irem eigen leib kein ehre thun (wie S. Paulus Coloss. 2.
sagt) vnd bald ander leut vrteilen/ vnd verdammen / wo
etwo eine Jungfraw zum tanz gehet / oder einen roten
Rock tregt zc.

Denn das kan Gott wol leiden (wo du sonst ein
Christen bist) das du dich nach deiner masse kleidest/
schmückest oder wollebest / zun ehren vnd zimlichen freu-
den/ Allein/das es eine masse bleibe/vnd messigkeit heisse/
Das ist/ nicht also aus aller weise vnd zucht/ vnangese-
hen/ freud vnd lust/ sich wollen sehen lassen / das
man es vbermachen / vnd alles vnnützlich
verschwenden könne/ Daher denn fol-
gen mus solcher vnrat vnd scha-
den/ als Gottes straffe/ scha-
ken/ wuchern/ rauben
vnd stelen/ bis zu
lett/ beide/
Herrn vnd vnterthanen/
einer mit dem andern
verderben.

Proverb. xx.

Der Wein macht lose Leute / vnd starck getrencke
macht wilde / Wer dazu lust hat / wird nimer weise.

Isaias v.

Behe denen / die des morgens früe auff sind / des
sauffens sich zu vleissigen / vnd sitzen bis in die nacht / das
sie der Wein erhitzt / vnd haben Harffen / Psalter / Pau-
cken / Pfeiffen / vnd Wein inn irem wolleben / vnd sehen
nicht auff das werck des HERRN / vnd schawen nicht
auff das geschafft seiner hende. Darumb wird mein
Volck müssen weggeführt werden vnuersehens / vnd wer-
den seine Herrlichen hunger leiden / vñ sein Pöbel durst
leiden / Daher hat die Helle die Seele weit auffgesper-
ret / vnd den Rachen auffgethan / on alle masse / Das hin-
unter faren beide ire Herrlichen vñnd Pöbel / beide ire
reichen vnd frölichen / das jederman sich bücken müsse /
vnd jederman gedemütiget werde / vñnd die augen der
hoffertigen gedemütiget werden / Aber der HERR Ze-
baoth erhöhet werde im Recht / vñnd Gott der Heilige
geheiliget werde in gerechtigkeit. Da werden denn die
Lemmer sich weiden an jener stat / vnd frembdlinge wer-
den sich neeren in der Wüsten der fetten.

Isaias iij.

Hureren / Wein vnd Most / machen tolle.

Joel j.


Dis ist das wort des HERRN / das geschehen ist
zu Joel


E iij


zu Joel dem son Bethuel / Höret dis jr Eltesten / vnd
merck auff alle Einwoher im Lande / Ob ein solches ge-
schehen sey bey ewer zeiten / oder bey ewer Väter zeiten /
Sagt ewern Kindern dauon / vnd lassts ewr Kinder jren
Kindern sagen / vnd dieselbigen Kinder jren andern nach-
komen / Nemlich / was die Raupen lassen / das fressen die
Hewschrecken / Vnd was die Hewschrecken lassen / das
fressen die Kefer / vnd was die Kefer lassen / das frisset
das Geschmeis.

Wachet auff jr Truncken / vnd weinet vnd heulet
alle Weinsuffer vmb den Most / Denn er ist euch für
ewrm maul weggenomen / Denn es zeucht herauff inn
mein Land ein mechtig Volck / vnd des ohn zal / das hat
zeene / wie Lewen / vnd backen zeene / wie Lewinne. Das
selbig verwüstet meinen Weinberg / vnd streiffet meinen
Feigenbaum / schelet in / vnd verwirfft in / das seine
Zweige weis da stehen / Heule wie eine
Jungfraw / die einen Sack an-
leget vmb jren Brüs-
tigam.

Gedruckt zu Erfurde /
Bey Barbara Sachssin.







Jb-3676 a

ULB Halle
003 704 98X



3

PA 302





Warte
keit v
p

Lieber
müchter

Casse
die Hu
cher/ n
Trunch
werden

ter
der

und

Jeder
Ehbre
noch die
Neuber

Abb. 4^a (2)

